


ՀԱՅՐԱՊԱԵՏԱԿԱՆ
ԿՈՆԴԱԿԱՆԵՐ



ՕՐՀՆՈՒԹԵԱՆ
ԳՐԵՐ

**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ՝ «ՄԱՐԴԻԿ ՈՐՊԵՍ ԵՂԲԱՅՐՆԵՐ ԵՒ ԵՐԿՐԱԳՆԴԻ ԱՊԱԳԱՆ.
ԿՐՈՆՆԵՐՆ ՈՒ ՄՇԱԿՈՒՅԹՆԵՐԸ ԵՐԿԽՈՍՈՒԹՅԱՆ ՄԵՃ»
ԽՈՐԱԳՐՈՎ ՀԱՄԱԺՈՂՈՎԻՆ**

(Հոռմ, 6–7 հոկտեմբերի, 2021 թ.)

Աստված գոհունակությամբ ողջունում ենք Սանտ Էջիդիոյի համայնքի կազմակերպած միջկրոնական ու միջմշակութային երկխոսության հերթական համաժողովը: Մեր օրհնությունն ու գնահատանքն ենք բերում կազմակերպիչներին ու նախաձեռնողներին: Նրանց ազնիվ ջանքերով ենք այսօր հնարավորություն ստացել՝ կրկին համախմբվելու եւ կիսելու տարբեր կրոնների եւ մշակույթների փոխճանաչողության ու փոխըմբռնման մասին մեր մտահոգություններն ու ընկալումները:

Հակառակ պատմական տարբեր փորձառությունների, առկա կրոնական, մշակութային եւ աշխարհընկալման տարբերությունների՝ մենք բոլորս մեկ Աստծու զավակ ենք, եղբայրներ եւ քույրեր՝ միավորված Աստծու սիրով: Եւ հենց այս բազմազանության մեջ մեր սիրո միությունն է՝ Աստծու զավակ լինելու վավերական վկայությունը: Աստծու ամենախնամ սիրո գիտակցումն է փոխըմբռնման հիմքը եւ համոզումը, որ բոլոր մարդիկ, իբրեւ Աստծու զավակներ, կրողն են Ամենակալի կողմից շնորհված խաղաղ, ազատ ու անկախ կյանքի սրբազան իրավունքի: Այս ընկալումներին հակադրվող քայլերն են նեղացնում միմյանց առավելագույնս ճանաչելու եւ հասկանալու հնարավորություններն ու հորիզոնները, փակում նույն Աստծու կողմից արարված մարդկանց սրտերն ու մտքերը, աչքերն ու ականջները՝ դարձնելով նրանց անտարբեր միմյանց ցավի ու դժբախտության, նեղությունների եւ համամարդկային հիմնախնդիրների նկատմամբ: Աստվածատուր այդ սիրո եւ եղբայրության մեջ տեղ

չունեն թշնամանքն ու անհամերաշխությունը, որոնք այսօր էլ շարունակում են փորձություն մեջ պահել մարդկային հասարակությունը՝ պատերազմներով ու ահաբեկչություններով, նաեւ կրոնական ատելությամբ ու խտրականությամբ: Մեր եղբայրներից եւ քույրերից շատերն աշխարհում ամեն օր ենթարկվում են տիրապետելու մոլուցքից, անարդարությունից ծագող բռնության տարբեր դրսևորումների, որոնք ստեղծում են ատելություն ծնող հոգեւոր ամայություն: Յեղասպանություն վերապրած մեր ժողովրդի պատմության էջերը գրվել են հաճախ նահատակների ու հավատի վկաների արյամբ: Հետեւաբար լավ գիտենք արժեքը սիրո, եղբայրության, ժողովուրդների բարեկամության, խաղաղ ու ապահով կյանքի: Եւ սրտակից ենք մեր եղբայրների ու քույրերի տառապանքներին, քանզի Սուրբ Պողոս առաքյալի խոսքով՝ Աստված «մեկ արյունից ստեղծեց մարդկանց բոլոր ազգերը, որ բնակվեն երկրի վրա» (Գործք ԺԷ. 26):

Անցյալ տարի աղետալի փորձության ենթարկվեցին մեր երկիրն ու ժողովուրդը, երբ Ադրբեջանը, Թուրքիայի բացահայտ զորակցությամբ եւ ահաբեկչական խմբավորումների ներգրավմամբ, վերստին պատերազմ սանձազերծեց Արցախի Հանրապետության դեմ: 44-օրյա պատերազմի ընթացքում օգտագործվեցին արգելված զինատեսակներ նաեւ ընդդեմ Արցախի խաղաղ բնակչության: Զոհվեցին, վիրավորվեցին, հաշմանդամ դարձան հազարավորներ, տասնյակ հազարավորներ տարհանվեցին իրենց բնակավայրերից, ոչնչացվեցին ու պղծվեցին եկեղեցիներ ու վանքեր, մշակութային հուշարձաններ, նաեւ՝ հետպատերազմյան շրջանում: Գերեվարվեցին շատերը, եւ խաղաղ բնակիչներ, որոնք այսօր շարունակում են ենթարկվել նվաստացումների ու աննկարագրելի խոշտանգումների՝ հակառակ միջազգային հանրության, եկեղեցական կառույցների եւ մարդասիրական կազմակերպությունների կողմից ազատ արձակման վերաբերյալ հնչող հարատեւ կոչերի: Ցանկանում ենք արձանագրել, որ պատերազմական գործողությունները ոչ միայն ողբերգություն դարձան մեր ժողովրդի, այլեւ հենց պատերազմը սանձազերծած երկրի՝ Ադրբեջանի համար, որը նույնպես կրեց մարդկային ծանր կորուստներ: 44 օր տեւած արյունալի պատերազմը հնարավոր եղավ դադարեցնել Ռուսաստանի Դաշնության նախագահ մեծահարգ տիար Վլադիմիր Պուտինի ջանքերի շնորհիվ: Հավատում ենք, որ ԵԱՀԿ Մինսկի խմբի միջնորդական առաքելությամբ կկարգավորվի Արցախի կարգավիճակի հարցը: Ադրբեջանի ագրեսիան Արցախի Մեր զավակների նկատմամբ եւ նման

ոճրագործությունները այլ ազգերի հանդեպ, անտարակույս, խստորեն պիտի դատապարտվեն միջազգային ողջ հանրության կողմից, որպեսզի այդպիսի ողբերգություններ չկրկնվեն ժողովուրդների կյանքում:

Սիրելիներ, համընդհանուր գործակցության ու ջանքերի կարիքն է զգացվում՝ բարեկարգելու համար մեր ընդհանուր տունը՝ Երկիր մոլորակը, որպեսզի այնտեղ տիրապետող լինի եւ դեպի երջանկաբեր կարգավորումներ առաջնորդի խաղաղությունը՝ մեր Փրկչի պատգամի համաձայն. «Իրար հետ խաղաղությանմբ ապրեք» (Մարկ. Թ. 49): Հեշտընթաց չեն փոխըմբռնման ու փոխճանաչողության վրա հիմնված խաղաղության ճանապարհները, բայց միշտ՝ հնարավոր, եթե կան ազնիվ ու մաքուր հոգով համամարդկային բարօրությանը, խաղաղ ու ստեղծագործ կյանքին ծառայելու կամքը, ձգտումը:

Աշխարհի չորս անկյուններում ապրող մեր ժողովրդի զավակները տարբեր ազգերի հետ խաղաղ համակեցությանմբ լավագույն վկայությունն են բերում մշակույթների եւ կրոնների երկխոսության, եւ հավատում ենք, որ միմյանց նկատմամբ ազնիվ եղբայրասիրությանմբ ու համատեղ ջանքերով իրականանալու է մարգարեական խոսքը, երբ ազգերն «իրենց սուսերներից խոփեւ պիտի ձուլեն եւ իրենց սվիններից՝ մանգաղներ» (Շա. Բ. 4):

Մենք աղոթում ենք, որ բացվեն բոլոր մարդկանց սրտերն ու մտքերը՝ մարդկության կյանքի նորոգման համար մարդուն վերահաստատելով Աստծուն արարչակից լինելու իր ճշմարիտ կոչման ու նպատակի մեջ: Թող Աստված ունկնդիր լինի մեր աղոթքին, զորացնի մեզ մեր առաքելության մեջ եւ օրհնի բոլոր ազնիվ ջանքերը հանուն խաղաղության եւ ժողովուրդների համերաշխության: Աստծու շնորհն ու սերը թող լինեն մեզ՝ ամենքիս հետ, ամեն:

